

# Keharmonian: Peranan parti2 politik

**SOAL:** Perpaduan Melayu — perpaduan UMNO — ialah tunjang kestabilan dan keteguhan Barisan Nasional. Merenung sepuluh tahun ke hadapan, adakah Datuk Seri melihat apa-apa yang boleh menggugat perpaduan ini? Atau adakah faktor-faktor tertentu yang akan mengukuhkannya?

■ **PM:** Kita yakin tidak banyak halangan yang akan merintang usaha mencapai matlamat perpaduan kita. Walaupun demikian, kita dapati di dalam masyarakat Melayu, dan juga masyarakat Cina, memang ada pihak-pihak yang mempunyai pendapat ekstremis dan yang menjadi activist dan agitators untuk membangkitkan perasaan benci antara kaum.

Mereka ini sengaja mencari-cari isu. Kadang-kala isu-isu yang mereka bangkitkan itu berjaya pula membangkitkan perasaan marah di kalangan setengah kaum terhadap sesuatu. Jika perasaan marah ini tidak dibendung, jika tidak ada usaha Kerajaan untuk membanteras perasaan ini, ada kemungkinan sesuatu kejadian akan berlaku dan kejadian yang kecil pada mulanya ini mungkin akan membesar jika tindakan tidak diambil segera.

Bahaya ini memang ada dan boleh datang dari orang Melayu atau pun bukan Melayu. Kita berpendapat kejadian seperti ini dapat dielakkan jika kita berusaha sepanjang masa memberi penerangan, penjelasan dan juga mengadakan pemerintahan yang adil kepada semua kaum.

**SOAL:** Apakah peranan dan sumbangan parti-parti politik lain — di dalam dan di luar Kerajaan — dalam mengekalkan keharmonian antara kaum dan perpaduan rakyat?

■ **PM:** Semua parti politik memainkan peranan yang besar dalam memperkukuh keharmonian antara kaum. Jika mereka mengurangkan tekanan-tekanan yang boleh membangkitkan perasaan perkauman, maka keharmonian dan perpaduan kaum akan dapat dikekalkan. Tetapi jika mereka memandangkan semata-mata kepada kepentingan mereka sendiri sahaja tanpa mengira dan mengambil berat tentang kepentingan negara, maka ada kemungkinan peranan mereka ini akan membawa akibat buruk.

**Sedutan dari buku terbaru Perdana Menteri, 'Cita-cita dan Pencapaian', akan terbit segera.**